



Еврейлерге пічік

Ин пурунғы тустардан пасти Христос ўгредиин истесчеткеннер, пу пічіктің авторы позын адабааннанар, аның кем полғанынаңар сурығда пір чөпке килбееннер.

Піреезі авторға Павел илчіні санапчалар. Че пазылғанынаң паза сағыс оңдайынаң пу пічік Павелнің пасха пічіктеріне төөй нимес. Пасха истезігчилер аның авторына Павелнің хабасчыларының, Варнаванан Аполлостың, піреезі полған полар тіп, санапчалар, хайзылары пасха кізілерні адабохчалар. Пурунғыдох Христос ўгредииинің пір ўгретчізі теен полған: «Тигіриб „Мин аны пасхам“ тіп поларчых».

Пічіктің адалғаны паза киречілес оңдайы аның еврей христианнарға пазылғанын көзітче. Оларның тигіриблері хайда орныхханы пілдізі чогыл – Римде, Иерусалимде, Александр-саарда алай пірее пасха орында ба. Пічік наа эраның 60–70 чылларында пазылған полар.

Авторның өөн пөгіні – Христос киртінізі, иудейлернинең тиңнестіре, артых полчатханын көзідері. Ол оңдайынаң автор, пічиин адапчатхан кізілерні Христосха киртіністе пик ползыннар паза аар тустар килібіссе, иудаизмге айлан парбазыннар тіп, тимнеп саларға харасча. Пурунғы тустарда ухаанчылар паза ангеллер кізілерге Худай хабарын чарлааннар. Амды, тізең, Худай Оолғы Христостың, сын-чахсы Абыстың паза олох туста сын-чахсы Толығның тузы читті.

Христостың Позын тайыға салғаны киртінчеткеннерні санайға чазыхтаң ахтабысхан.

Христоснаң хада поларына кізі Агаа киртінгенінең пастыра читче. Пурунғы Молчағдағы көп кізі, постарының ізеністерінің толғанын көргелекке дее, ідөк христианнар, киртіністері ўчүн сўрдірзелер дее, Худайға киртінген чіли, Христосха киртінерге киректер.

Худай Оолғының пастыра чоохтанча

1 Худай пурунғыдан ала оң-пазы ондайларнаң өбекелерібіске ухаанчылар^с пастыра көп хати чоохтанған. ² Пу халғанчы күн-нерде, тізең, Ол піске Оолғының пастыра чоохтаан. Худай Оолғын прай нименің ээзі полар тіп чарат салған паза Аның пастыра тилекейні чайап салған. ³ Оолғы — Пабазының сабланызының чарии полып, Аның сын Позының омазы полча. Ол Позының күстіг сөзінең тиксі-тилекейні орнында тутча. Ол, пісті чазыктарыбыстан^с ахтабызып, тигірде илбек Худайның оң саринда одыр салған.

Худай Оолғының илбегі

⁴ Худай Ағаа ангеллердең^с хай син пөзік ат пирген, олох син Ол Позы даа ангеллердең пөзік. ⁵ Худай ангеллерге пірдеезіне хақан даа тібеен: «Син минің Оолғымзың. Пүүн Мин Сині төрїтїм». Піди дее тібеен: «Мин ағаа Паба поларбын. Ол, тізең, Минің Оолғым полар». ⁶ Хақан Худай Позының тун Оолғын ах-чарыхсар ысханда, теен: «Прай Худай ангеллері Ағаа пазырзыннар». ⁷ Ангеллерденер, тізең, Худай теен: «Худай ангеллерні чиллер осхас итче, нымысчыларны чалын осхас итче». ⁸ Позының Оолғынаңар, тізең, Худай теен: «Худай, Синің хан-ўлгўн^с түгенмес. Кїзілернең орта устирзың. ⁹ Син орта нимее хынчазың, чабал нимені, тізең, хырт көрчезің. Аннаңар Худай, синің Худайың, сині таллаан паза сағаа арғыстарыңнаң пөзік өрїністі сыйлаан». ¹⁰ Худай паза піди теен: «Хан-пиг^с, син пастап чирні төстеп салғазың, анаң Позыңның холыңнаң тигірні чайап салғазың. ¹¹ Чир-чалбах таа, тигір дее чох пол парар, Син, тізең, хақан даа поларзың. Олар, иргі кип-азах чїли, изел парарлар. ¹² Син оларны, чорғанни чїли, пўктебізерзїң, олар даа, кип-азах алыстырылғанни, алыстырыл парарлар. Че Син алыспинчазың, Синің күннерің дее түгенминче». ¹³ Худай ангеллернің пірдеезіне хақан даа тібеен: «Синің ыырчыларыңны азааң алтына сал пирбеенімче, Минің оң саримда одыр». ¹⁴ Ангеллер Худайның нымысчылары ла. Олар арачылан халар кїзілернің нымызына чөрерге турғызыл парғаннар.

Пістің илбек арачыланызыбыс

2 Аннаңар піс, саба чолға кірібіспес үчүн, пісті үгреткен нимее өнетін хайығ саларға кирекпіс. ²Пістің өбекелерібіске ангеллернің пастыра пирілген үгредігнің Сөзі сын полтыр. Аны сайбааны паза испеені сыбыра орта хатығлатхан. ³Аннаңар андағ илбек арачыланысты хыйа идіп, хатығластаң хайди осчаң поларбыс. Пу арачыланыстаңар пастап Хан-пиг Позы чарлаан полған. Аны искен кізілер, тізең, піске пу үгредігнің сын полчатханын көзіткеннер. ⁴Ағаа хоза Худай, хайхастарны^с, танығларны паза аймах-пасха таңнастығ киректерні киречілес идіп, Худай Худының^с сыйыхтарын Позының көнніңче үлестірген.

Пісті арачыланысха ағылчатхан Иисус

⁵Худай ангеллерні килер наа чуртас ондайынаң устирға турғыспаан. Піс аннаңар чоохтапчабыс. ⁶Худай Пічинде^с хайда-да аннаңар піди чоохталча: «Худай! Кемдір ол, кізі, Син аннаңар сағынарға? Алай кемдір ол, Кізі Оолғы^с, Син Аннаңар сағыссырға? ⁷Син аны ангеллердең төбін тұрчеге ле турғысхазың. Син, аны сабланысха паза аарласха чазап салып, Синің холың чайаан прай нимені Аның үлгүзіне кир салғазың. ⁸Син прай нимені Аның азаа алтына тастаазың». Мында «прай нимені Аның азаа алтына» тіп чоохталча. Анзы Аның холына кірбеен ниме халбаанын таныхтапча. Че сағам піс прай ниме Аның үлгүзінде полчатханын көрбинчебіс. ⁹Че піс Иисусты көрчебіс. Худай, кізілерге паарсап, Иисусты оларның прайзының үчүн өлерге ысхан. Аннаңар Аны ангеллердең төбін үр нимеске ле турғысхан. Иисус ирееленісте үрееннер, тізең, Худай Аны сабланысха паза аарласха чазап салған.

¹⁰Чуртасты чайап салған паза прай нимее тын кирген Худай орта иткен. Ол, Иисусты ирееленістері пастыра сынап, Аның толдыра киртістіг полчатханын көрген. Иисус кізілерні сабланыстығ арачыланысха ағылча нооза. ¹¹Чазыхтаң арығлапчатхан Иисус кізі полча, чазыхтаң арығланчатханнары даа — кізілерөк*. Аннаңар оларны харындастар тіп адирға Ағаа уйадыстығ нимес. ¹²Ол Худайға тіпче: «Харындастарыма Синің адың чарлабызарбын. Оларның чыылығларында Сині сарыннаң сабландырарбын».

* ^{2:11} Пу стихты піди дее онарарға чарир: «Чазыхтаң арығлапчатхан Иисусты паза чазыхтаң арығланчатхан кізілерні хайзын даа пір Паба чайап салған».

¹³ Ол идок типче: «Худайға изенербін» паза «Мин мынабын, мағаа Худай пирген палалар даа мына». ¹⁴ Пу палалар ит-ханның кизилер полчатханнаңар, Иисус таа оларох осхас: кизи ит-ханында килген. Ол анзын кизилерни өлимге ағылчаң күзи пар сайтанның^с Позының өлімінең чиңип алар үчүн иткен. ¹⁵ Ол ондайнаң өлеринен хорыхчатханнаңар чуртастары тооза хулда чөрген кизилерни пос иткен. ¹⁶ Пилдістіг нооза Иисус ангеллерге нимес, че Авраамның^с төліне полысча. ¹⁷ Аннаңар Иисусха, Худайның алнында сын паза чағбан чүректіг иң улуғ абыс^с полар үчүн, Авраам төлі осхас поларға кирек. Прай ол ниме Худайдаң кизилерниң чазыхтарын тастабызардаңар сурынып алар үчүн полған. ¹⁸ Иисус, Позы даа сынатырған паза ирееленген үчүн, амды сынатырчатхан кизилерге полыс полар.

Иисус Моисейдең улуғ

3 Ах-арың^с харындастар, пісті дее Худай тигірзер хығыртхан! Худай пістің киртінізібистің иң улуғ Абызы поларға тіп ысхан Иисустанар сағынчадыңар. ² Моисей^с Худайның туразындағы тоғысха киртістіг полған чили, Иисус таа Аны ысханға киртістіг полған. ³ Тураны пүдірген кизи пүдір салған туразынаң артых сабланысха турысча. Иисус таа идок Моисейниң сабланызынаң артых сабланысха турысча. ⁴ Ноо даа тураны кем-де пүдір салған. Худай, тізең, прай нимені пүдір салған. ⁵ Моисей, Худайның чоңына полызып, киртістіг нымысчы полған. Аның пастыра Худай соонаң полар нимеденер чарлаан. ⁶ Христос, тізең, Худайның Оолғы полып, Худайның туразынаң устирға турғызыл парған. Піс – Аның туразыбыс, сынап, түгеде махачы тудынчатсабыс паза Худайға изенізібіснен махтанзабыс.

Худай пирчеткен тынанчаң орын

⁷ Аннаңар Худай Худы пиди типче: «Пүүн Худайның үнін исчетсенер, ⁸ тас чүректіг полбаңар. Обекелерің, хуу чазыда сынатхан туста Мағаа удурласханда, андағ полғаннар. ⁹ Олар хырых чыл изере мин иткен киректерни көргеннер. Андағ даа полза, Мини сыныхтааннар паза Минің тыстанызымны сынааннар. ¹⁰ Аннаңар Мин, пу төлге тарынып, теем: „Чүрекері Миннең ырап ла одырча, Минің чолларымны олар пилбинчелер“. ¹¹ Пу төлге өкпем көдіріл парып, сөс пиргем: „Мин пирчеткен тынанчаң орынға олар хаңан даа кірбестер“».

¹²Харындастар! Чүректерің чабал, сын нимес полбазын, тіріг Худайыбыстан хыйа парбазын тіп, сизінінер. ¹³Чазых сірерні чолдаң хыйыстырыбызып, өчес пол парбастарың үчүн, күннің сай удур-төдір көннелерің көдірізіңер. Иди Худай Пічиинде «пүүн» тіпчеткен тус иртискенче итchedінер. ¹⁴Піс Христоснаң хада тоғынчабыс. Сынап пастабох алған чуртасты ікінчілес чох читіре хайраллап халзабыс, іди ле пол турар. ¹⁵Худай Пічиинде чоохталча нооза: «Пүүн Худайның үнін исчетсеңер, тас чүректіг полбаңар. Өбекелерің, хуу чазыда сынатхан туста Мағаа удур-ласханда, андағ полғаннар».

¹⁶Худайның үнін истіп, Ағаа удурласхан кізілер кемнер полғаннар? Моисей Египеттең сығарған кізілернің прайзы полған нимес пе зе? ¹⁷Кем Худайны хырых чыл өкпелендірген? Чазых ит салып, сөөктері хуу чазыда чат халған кізілер полбаан ма ол? ¹⁸Кемні Худай «Мин пирчеткен тынанчаң орынға олар хаңан даа кірбестер» тіп харғап салған? Ағаа удурласханнарны нимес пе зе? ¹⁹Ам піс көрчебіс: олар Худай молчаан орынға киртініс чохтарынаңар кір полбааннар.

4 Худай піске тынағ пирерін молчаан. Аннаңар, піреелерің аны ал полбин халбас үчүн, сизіктіг польнаңар. ²Піске дее, Моисейнең хада парғаннарға чили, Чахсы Хабар читірілген. Че олар искен нимені посха албааннар, киртінмееннер. Аннаңар оларға ол хабар туза полбаан. ³Піс, киртінчеткеннер, Худай молчаан тынағны алчабыс. Худай, тилекей чайалғанда, прай тоғызын ит салған даа полза, піди теен: «Пу төлге өкпем көдіріл парып, сөс пиргем: „Мин пирчеткен тынанчаң орынға олар хаңан даа кірбестер“». ⁴Худай Пічиинде хайда-да чоохтал парған нооза: «Читінчі күнінде Худай, прай Позының тоғызын ит салып, тынанған». ⁵Че олох туста піди чоохталча: «Мин пирчеткен тынанчаң орынға олар хаңан даа кірбестер». ⁶Пу Чахсы Хабарны пурнада искен кізілер, Худайның чооғын испеенненер, пу тынаға чит полбастар. Аннаңар пасха кізілерге тынағ ал полчаң ондай пар. ⁷Худай, наа күн чарлап, аны «Пүүн» тіп адап салған. Көп тус ирткен соонаң Худай анзын Давид^с ханның пастыра чарлаан. Алында чоохталған полған: «Пүүн Худайның үнін истіпчетсеңер, тас чүректіг полбаңар».

⁸Иисус Навин оларға Худай молчаан тынағ пирген полза, аның соонда пасха күннеңер чоохталбасчых. ⁹Аннаңар Худайның

чонына Худай тынанған осхас тынағ пирілер. ¹⁰Худай молчаан тынағны алған кізілер, Худай Позының тоғызынаң тынанған чіли, постарының тоғыстарынаң тынанып алғаннар. ¹¹Пу тынағ орнына кірер үчүн, прай ниме идерге күстенеенер. Моисейнең хада чөргеннер чіли, чоох испес полбаанар.

¹²Худайның сөзі тіріг паза позының тоғызын ит парча. Ол ікі сари чітіділген хылыстаң даа чітіг. Ол, тирең өтіп, кізінің тынын худынаң, сөөктерін, тізең, чіліннерінең чар полар. Ол туйух сағыстарны даа, чүректің чазыт хынығыстарын даа чарғылапча. ¹³Худайдаң пір дее ниме чазыр полбассың. Прай чайалған ниме Аның хараа алнында паза Ағаа азых. Аның алнында піс иткен киректерібіс үчүн нандырығ тударбыс.

Иисус пістің иң улуғ абызыбыс

¹⁴Пістің Иң улуғ абыс Худай Оолғы Иисус пар. Аның тигірдегі Худайның алнында даа турыбызар ондайы пар. Аннаңар пістің киртінізібіске пик тудыныңар. ¹⁵Читпестерібіске чүрексібес иң улуғ абыс нимес ол. Пістің прайзыбызох чіли, Ол сынатхан, че чазыхха кірбеен. ¹⁶Аннаңар піске паарсазы толдыра Худайның алнына тідімніг килерге чарир. Анда хызылчатхан тузыбыста піске полыс пирер үчүн, Худай піске өлчей паза паарсас пирер.

5 Кізілернің санынаң табылған ноо даа иң улуғ абыс оларның үчүн Худайның нымызына чөрерге турғызыл парған. Ол, Худайға сыйыхтар салып, кізі чазыхтары үчүн тайығ^c итче. ²Ол иң улуғ абыстың читпестері пар. Аннаңар ол, пілістері читпинчеткен паза алчаастар итчеткен кізілерге айап, өкпезін читірбинче. ³Позының читпестері парданаң, тізең, ағаа пасхаларының на чазыхтары нимес, че позының даа чазыхтары үчүн тайығ идерге кирек. ⁴Пос көннінче пірдеезі иң улуғ абыс пол полбас. Ааронны таллаан чіли, иң улуғ абысты Худай таллир.

⁵Ол ондайнаң Христос таа иң улуғ абыстың сабланызын паза адын Позы албаан. Че Худай Ағаа теен: «Син Минің Оолғымзың. Пүүн Мин Сині төріттім». ⁶Худай Пічиинің паза пір орнында Худай тіпче: «Син хақан даа Мелхиседек осхас абыс поларзың». ⁷Иисус чир үстүнде чөргенде, пазырып ала, харах чазын төгіп, оорлап, Худайны алдаан. Аның Иисусты өлімнең ал халар ондай полған нооза. Иисус, Худайны улуғлап, Аның

чооғын искен, аннаңар Худай Аның алданызын ис салған. ⁸Че Иисус Худайның Оолғы полза даа, Ол ирееленістің пастыра чоох истерге үгренип алған. ⁹Хачан Ол кирек тиміне чит парғанда, Аның чооғын исчеткен кізілерге мөгі арачыланыс пирчен ондай полған. ¹⁰Худай, тізен, Аның, Мелхиседек осхас, иң улуғ абыс полыбысханын чарлаан.

Киртіністі тастабаңар

¹¹Анынаңар мин сіерге көп чоохтап поларчыхпын. Сіер истерге арғаастанчатханнаңар, анын сіерге оңарылдыра чоохтирға сидік. ¹²Сіерге постарына үгретчі полыбызарға тус читкіче полған. Че Худай сөзі чоохтапчатхан олаңай нимелерге сіерні ам даа үгредерге кирек. Пасха ондайнаң чоохтаза, улуғ кізі чіпчеткен чиистің орнына сіер ам даа сүтнең не азыранчазар. ¹³Сүтнең азыранчатханы ыңаачах полча. Андағ кізі чахсынаң чабалны талластыр полар ба за. ¹⁴Хатығ чиис улуғ кізілерге пиріледір. Олар көпті көргенненер, чахсыны чабалдаң талластыр пілчелер.

6 Хриостоңар үгредігнің пастағларын үзүрбин, пик киртіністіг кізілерге килістіре чоохха кіреенер. Аннаңар, киртіністің төстеен хатап салбин, Худайға кирек чох киректерні тастирданаңар паза киртінеріне айланарданаңар үгретпеенер. ²Кіреске түзеріненер^с, кізілернің пастарына хол саларданаңар, өліглер тірілеріненер паза түгенчі күннің^с чарғызынаңар чоохтаспаанар. ³Итсе, Худай пирзе, анын даа чоохтазарбыстар. ⁴Пірее кізілер киртіністерінен хыйа парчалар. Олар Худайның чариинаң чарыдыл парған полғаннар. Олар тигірдең түскен сыйыхты сынааннар, оларның істілерінде Худай Худы полған. ⁵Олар Худай сөзі чахсы полчатханын чуртастарында постары көргенненер, Худай үлгүзінің күзін сизінгенненер. ⁶Че олар киртіністерін тастабысханнар. Андағ кізілерні Худайға хатап айландырчаң ондай чоғыл. Олар, Худайның Оолғын хатап кіреске хазап, Аны уйатха сухчалар нооза. ⁷Наңмыр көп хати суғлаан чир, анда тоғынчатхан кізілерге тузалағ өзімнер өскіріп, Худайның алғызын алча. ⁸Че пуртах отнаң хазалчыхтар сығарчатхан чир пір дее нимее чарабинча. Андағ чирні Худай харғапча. Ол өртке чох иділер.

⁹Хынғаннарым! Піс піди тіпчеткен дее ползабыс, сіерні андағ ниместер тіп ізенчебіс. Піс сіернің арачыланысха тудынчатханнарыңны пілчебіс. ¹⁰Худай саба идер чоғыл. Ол сіернің

хайди тоғынғаннарынны паза Позына хайди хынғаннарынны ундутпас. Сірер Худайға хынчатханнаңар, пасха ах-арығ кізілерге полысхазар паза полысчазар нооза. ¹¹ Мындағ кўстеністі сірернің полғаны ла түгенчізіне теере көзітсін тіп сағынчабыс. Андада прай ізенчеткен нимелерің толар. ¹² Піс, сірерні арғаастанмазыннар, че киртінчеткен паза прай нимее тыстанчатхан кізілерге көөксіннер тіп, сағынчабыс. Андағ кізілер Худай молчаан нимені аладырлар.

Худайның ізестіг сөс пиргені

¹³ Худай Авраамға сөс пирчеткенде, киречее Позы Позын турғысхан. Позынаң улуғ пірдеезі чох полған нооза. ¹⁴ Худай теен: «Мин сині алғирбын паза көп төл сағаа пирербін». ¹⁵ Авраам, тыстанаачызы үчүн, Худай молчаан нимее читкен. ¹⁶ Кізілер молчапчатсалар, постарынаң улуғны киречее хығыртчалар. Ноо даа таласты молчағнаң тоозадырлар. ¹⁷ Худай кізілерге молчағ пирген. Ол даа Аның молчаа хайди даа толарын кізілерні пілзіннер тіп сағынған. Аннаңар Ол пу молчағларның киречізіне Позы Позын турғысхан. ¹⁸ Худайның киречілезі паза молчаа алызар чоғыллар. Оларны пиріп, Худай чойлан полбас. Аннаңар піс, пу ізеніске килген чон, аның толарына көмес тее ікінчілебинчебіс. ¹⁹ Пу ізеніс піске пик паза ізестіг керіп көспезі осхас полча. Ол ізеніс пісті Худай храмының көзеңезі кистіндегі иң ызых^с орынзар апарча. ²⁰ Иисус, піске чол азып, андар кірген. Ол, Мелхиседек осхас, түгенмес тустарға иң улуғ абыс полыбысхан.

Мелхиседек Авраамнаң улуғ

7 Мелхиседек* Салим саарның ханы паза Өөркі Худайның абызы полған. Авраам, көп ханнарны чиңіп, айланчатханда, Мелхиседек аны, удурлап, алғаан. ² Авраам ағаа чаада утып алған аниинаң онынчы чардығын пирген. Мелхиседек ат «арығ чўректіг кізілернің^с ханы» паза «амыр хоныхтың ханы» теенін таныхтапча. «Салим» — ол «амыр хоных» теені нооза. ³ Мелхиседектің паба-ічезі, өбекелері кем полғаны пілдізі чоғыл. Аның төрееніненер дее, үрееніненер дее пір дее нима пілбинчебіс. Ол, Худай Оолғыох чіли, саңайға абыс полып халған.

* ^{7:1} Мелхиседек — көр: Пурунғы Молчағның «Пастағлар» (Бытие) киндезі.

⁴Көрінер, Мелхиседек хайдаг илбек кізі полған. Авраам даа, израиль чонының илбек пабазы, поэының чаа аниинаң онынчы чардығын агаа пир салған. ⁵Прай чон Авраамның төлінең сыххан полза даа, че Левийнің абыс полчатхан оолларына Моисей Чахия^c хоостыра чонның парызынаң онынчы чардығын аларға чарадылча. ⁶Мелхиседек, Левийнің төлі полбинчатса даа, Авраамның чаа аниинаң онынчы чардығын алған. Иди идібізіп, ол Худайның молчаан алған Авраамны алғабысхан. ⁷Улии кічиин алғидыр. Анзында ікінчилес чоғыл. ⁸Парыстың онынчы чардығын чыыпчатхан еврей абыстары өлерок кізілер. Онынчы чардығын чыыпчатхан Мелхиседек, тізең, олардаң улуғ – аннаңар түгенмес хоныхтыг тіп чоохталча нооза. ⁹Аннаңар чонның парызының онынчы чардығын алчатхан Левийнің ооллары постарының Авраам өбекелерінің пастыра Мелхиседекке онынчы чардығын пиргеннер тирге чарир. ¹⁰Мелхиседек Авраамға тоғасхан туста Левий төрелек тее полған. Че ол Авраамның үрен-төлінде полған.

Иисус абыс Левийнің төлінең сыххан абыстардаң улуғ

¹¹Моисей Чахия абыстарны Левийнің төлінең турғысхан. Ол абыстар Худайның пөгінін толдыр полған ползалар, Худайға Ааронның оолларының* орнына Мелхиседек осхас абысты тургызары нимее киректелерчк? ¹²Абыстарны алыстырғанда, Моисей Чахиин даа алыстыраға кирек. ¹³Абыс тіпчеткен Хан-пигібіс Левийнің сөөгінең полбаан. Аның сөөгінең сыххан кізілернің пірдеезі тайычаң орында хайынмаан. ¹⁴Хан-пигібіс Иуданың^c төлінең сыхханын піс пілчебіс. Моисей, абыстардаңар чоохтап, Иуданың сөөгін адабаан. ¹⁵Абыстарны табардаңар чахығ алыс парғаны, Мелхиседек осхас, пасха абыс сыхханы хоостыра улам чахсы көрінче. ¹⁶Хан-пиг, кізі чахығлары хоостыра нимес, че мөгі чуртас^c пирчеткен күске төстеніп, абыс полыбысхан. ¹⁷Худай Пічиинде аннаңар киречілес пар: «Син хачанға даа Мелхиседек осхас абыс поларзың». ¹⁸Абыстардаңар пурунғы чахығ, күзі паза тузазы чохтаңар, хыйа иділген. ¹⁹Моисей Чахия пісті Худайға көні ағылбаан. Че амды пісті Худайға чағдатчатхан артых ізеніс пирілген. Аннаң пастыра піс Худайға чағдапчабыс.

* 7:11 Аарон Левийнің төлінең полған. Иң улуғ абыстарны Ааронның на сөбірезінең табарға чарадылчаң.

²⁰Худай, Хан-пиг хачан даа абыс полар тіп, молчаан. ²¹Андағ молчағ пасха абыстарға пірдеезіне пирілбеен. Иисусха, тізең, Ол піди тіп молчаан: «Хан Худай^с молчаан паза пирген сөсті сайба-бас: „Син хачан даа Мелхиседек осхас абыс поларзың“». ²²Худай сөс пирген. Аннаңар иң артых молчағ сынында тоғынарына Иисус киртістіг киречи полча. ²³Абыстар, тустары чидіп, өл парчаннар, оларның орныларына пасхалары турғызылчаннар. Аннаңар турғызылған абыстар көп полған. ²⁴Че Иисус саңайға абысха турғызыл парған. Аның абыс полары түгенмес. ²⁵Аннаңар Ол Худайға Позының пастыра килчеткеннерні хачан даа арачылап полар. Иисус, оларданаң Худайдан сурынары үчүн, түгенмес хоныхтығ полар. ²⁶Иисус піске иң килістіре улуғ абыс полча: ах-арың, чабалы чох, пырозы чох. Ол чазыхтығлардан арон турча паза Ағаа тигірдең пөзік орын пиріл парған. ²⁷Иисусха, пасха абыстарға чіли, күннің сай тайығ идерге кирек чоғыл. Олар аны пастап постарының, анаң кізілернің чазыхтары үчүн итчедедірлер. Ол, тізең, прайзының үчүн пір хати паза хачанға даа Позын тайыға пир салған. ²⁸Моисей Чахии абыстарға олаңай, читпестері пар кізілерні турғысчаң. Че Моисей Чахииның соонда пирілген молчағ хачан даа прай чахсы нименің толымы полчатхан Олғын турғыс салған.

Иисус пістің иң улуғ абызыбыс

8 Піс чохтапчатхан нименің өөні мындағ: тигірде Илбек Худайның оң саринда одырчатхан иң улуғ абызыбыс пар. ²Ол иң ызых орындағы иң улуғ абыс полча. Ол орын, тізең, кізі холы нимес, Хан Худай пүдірген сын ызых отах полча.

³Полған на иң улуғ абыс Худайға сыйыхтар ағыладыр, тайығ идедір. Аннаңар пістің дее иң улуғ абызыбыстың ағылчаң нимезі поларға кирек. ⁴Мында, чир үстүнде, Моисей Чахиинда чоохталчатхан тайығларны итчеткен абыстар парлар. Аннаңар пістің иң улуғ абызыбыс чир үстүнде чуртаан полза, ол абыс пол полбасчых. ⁵Че хачан Моисей ызых отах пүдірерге итчеткенде, Худай ағаа теен: «Прай нимені, мин сағаа тағда көзіткен ондайча иділзін тіп, сыныхтабыс тур». Аннаңар чирдегі абыстар, тигірдегізіне көөгіп, хобырғаннарына ла килісче. ⁶Амды Худай Иисусты чирдегі абыстарның тоғыстарынан артых тоғысха таллап алған. Моисейге Худай пирген Молчағның^с хыринда Иисус пирген Молчағ кізілерге артых нимелерге ізеніс пирче нооза.

⁷ Пастағы Молчағның читпестері полбаан полза, ікінчізі кирек-телбесчік. ⁸ Че Худай, Позының чоңында читпес сарин көріп, теен: «Израильнең Иуданың чоңына Наа Молчағ пирер күннер чидіп одырлар, – тіпче Хан Худай. ⁹ Пу Молчағ алындағызынаң, Мин өбекелеріңні Египеттең чидектеп сығарған тустағызынаң, пасха. Олар андағы Молчағны толдырбааннаңар, Мин оларны позымнаң хыйа иткем. ¹⁰ Хан Худай идөк тіпче: Килер күннерде Израиль чоңына пирчең Молчаам мындағ полар: Минің чахығларымны оларның сағыстарына сиир саларбын, чүректерінде пас саларбын. Мин оларның Худайы поларбын, олар, тізең, Минің чоңым поларлар. ¹¹ Андада оларның прайлары, иң кічиинең иң улиина теере, Мині пілерлер. Аннаңар кізі кізее алай харындас харындазына „Худайны пілеріне чол ас пирим“ тирге кирек чох полар. ¹² Мин оларның пыроларын тастирбын, оларның чазыхтарын паза чабал киректерін ундут саларбын». ¹³ Мыны Худай «Наа Молчағданар» теен. Анзы алындағы Молчағ иргілен парғанын киречілепче. Иргілен парған ниме, тізең, табыраанча чох иділ парча.

Чирде паза тигірде пазыраы

9 Пастағы Молчағда Худайға хайди пазырарданар чоохталған. Аның хоостыра ызых отах турғызылған. ² Анда «ызых орын» полған. Ол орында чарытхылар полған паза Худайға салылған халастығ стол турған. ³ Көзеңе кистінде «иң ызых орын» тіп адалчатхан пөлік полған. ⁴ Анда тадылығ чыстығ отты өртеңең алтын чайындылығ орын полған паза алтын тастылығ сундух турған. Сундухта манналығ алтын идіс, Ааронның хачан-да пүрленібіскен тайағы паза Молчағ пазылған чалбах тастар чатханнар. ⁵ Сундухтың үстүнде ханаттығ ікі ангел иділ парған. Оларның аразында Худай поэнының сабланызында көрін парчаң. Ангеллернің ханаттары Худай чонның чазыхтарын тастачаң орынны көлечеңнер. Че сағам анзын изерістіре чоохтиры кирек чоғыл.

⁶ Ызых отахта прай ниме піди иділік полған. Абыстар күннің сай, постарының тоғызын идерге тіп, пастағы улуғ отахха кірчеңнер. ⁷ Ікінчі отахха, тізең, пір чылда пір хати иң улуғ абыс ла кірчең. Ол андар соххан малның ханын кир салчаң. Ол хан, поэын паза оңнабин халып, сайбағ иткен үчүн, чазыхха кір парған кізілерні арығлачаң. ⁸ Пу кибірлер пастыра Худай Худы, пастағы ызых отах турғанча, иң ызых орынзар чол азылбазын

піске көзітче. ⁹ Ол ызых отах пістің тустың омазы полча. Пу туста ағылған сыйыхтар паза иділген тайыңлар оларны итчеткен кізіні арыҥ чүректіг итпинчелер. ¹⁰ Моисей Чахииның чарадығлары чиилчеткен, зілчеткен нимелерденер, аймах чууныстардаңар чоохтапчалар. Олар идөк кізінің істің алыстырбинчатхан чахыңлардаңар чоохтапчалар. Олар Худай прай нимені наа оңдайнаң идібизер тусха теере пиріл парғаннар. ¹¹ Че Христос, киліп, піске соонар полар чахсы нимелернің иң улуғ абызы полыбысхан. Позының тоғызын итчеткен ол ызых отах кізі холынаң пүдірілген ызых отахтаң хай-хай артых. Ол пу чирде турбинча нооза. ¹² Христос иң ызых орынға кіргенде, өскілернің алай пызоларның ханын хада албаан. Че Позының ханынаң пір хати андар кіріп, пісті хулдаң саңайға позытхан. ¹³ Өртеен хазыраның ойбазынаң поралалған өскілернең пуғаларның ханы, Чахыҥ хоостыра Худайның алнында чазыхтыҥ кізілерге чачырадылып, оларны арыҥлапчатхан полза, ¹⁴ андада Христостың ханы хай син артых арыҥлап полар. Ол Позы пір пыро чох полчадып, Худай Худының пастыра Позын тайыҥа Худайға пирінген. Амды Ол пісті, өлімге ағылчатхан киректердең арыҥлап, тіріг, сын Худайның нымысчылары поларға үгрет салар.

¹⁵ Аннаңар піске Наа Молчағны пирген кізі Христос полча. Ол кізілернің пастағы Молчағның тузында иткен сайбағлары үчүн өл парған. Аның сылтаанда Худай мөгі чуртас аларға хығыртхан кізілерге молчаан нимені пирче. ¹⁶ Кізінің хумартхы сөзі* толдырылар үчүн, ол кізі өл парарға кирек. ¹⁷ Кізі тірігде, аның хумартхы сөзі күзіне кірбеен полча. ¹⁸ Аннаңар, пастағы Молчағ алылчатханда, хан киректелген. ¹⁹ Моисей пастап Чахииның чарадығларын чонға чарлаан. Анаң пызоларның паза өскілернің ханын алып, суғнаң порабысхан. Аның соонда хызыл өне сырлалған түкті паза иссоп ағастың салаазын алып, ханның суға өллеп, чонға паза Чахыҥ киндезіне чачыратхан. ²⁰ Анзын идіп ала, ол теен: «Пу хан Худай сірерні толдырзыннар тіп чахаан Молчағның киречізі полча». ²¹ Пуох ханнаң ызых отахха паза анда тузаланылчатхан ідістерге чачырадыбысхан. ²² Моисей Чахии хоостыра прай даа нима ханнаң арыҥлалча. Чазых таа, хан төгілзе ле, позыдылча.

* 9:16 Грек тілінде «хумартхы сөс» паза «молчағ» теенін пір сөс таныхтапча.

Христостың тайиш чазыхтаң арығлапча

²³Тигірдегіні сомнапчатхан нимелер малның ханынаң арығларға кирек полғаннар. Че тигірдегізі сын позы аннаң артых тайығ киректепче. ²⁴Христос, тигірдегізін сомнапчатхан, кізі холы иткен иң ызых отахха кірбеен. Ол, амды пістің үчүн Худайның алнында турызарға тіп, тигірге кірген. ²⁵Кізілернің абызы позының ханын нимес иң ызых орынзар пір чылда пір хати кирчен. Че Христосха Позын тайыға хати-хати саларға кирек чоғыл. ²⁶Иди киректелген полза, Ағаа, чир пүткеннең ала, көп хати ирееленерге килізерчік. Ағаа, тізең, чазыхты чох идер үчүн, Позын тайыға пирип, түгенчі кўннерде пір ле хати килерге киректелген. ²⁷Полған на кізее, пір хати өліп, Худайның чарғызында турарға киліс парча. ²⁸Христос таа ідөк, көп чонны чазыхтаң арығлабызар үчүн, Позын пір хати тайыға салған. Ікінчізін ол, чазыхтаң арығлабызарға тіп нимес, че Аны сағыпчатханнарны арачылир үчүн килер.

10 Моисей Чахии сын нименің киртістіг омазы даа полбаан. Ол килер чахсы нименің көлегі ле полған. Чахығ хоостыра кізілер чылдаң чылға пір төөй тайығлар итчеңнер. Че анзы тайығ итчеткен кізілерні артых итпинче. ²Тайығ иткені кізілерні чазыхтарынаң пір хати сынап арығлабысчатхан полза, олар андада, постарын пыро чох тіп санап, тайығларны паза итпесчіктер. ³Сынында, тізең, чылның сай иділчеткен тайығлар кізілерні чазыхтарынаңар сағындырғаннар. ⁴Пуғаларның паза өскілернің ханы кізілерні чазыхтарынаң арығлап полбас нооза. ⁵Аннаңар Иисус, тилекейзер парчатханда, Худайға теен: «Син сыйыхтарны паза тайығларны киректебинчезің. Че син мині кізі ит-ханнығ поларға тимнеп салғазың. ⁶Син кізілернің, чазыхтаң арығланарға идіп, тайығ орнында малны өртепчеткеннерін дее, тайығ итчеткеннерін дее көңніңе албинчазың. ⁷Андада Мин теем: „Мин мынабын. Миннеңер Моисей Чахиинда пазылғаны хоостыра, Худай, Мин Синің көңніңіңі толдырарға парирбын“. ⁸Иисус пастап теен: «Син кізілернің чазыхтардаң арығланар үчүн малны өртепчеткеннерін паза тайығ итчеткеннерін көңніңе албинчазың». Прай пу тайығлар Моисей Чахии хоостыра иділчелер. Андағ даа полза, Ол иди теен. ⁹Анаң Иисус теен: «Мин мынабын, Худай, синің көңніңіңі толдырарға парирбын».

Анзы Моисей Чахии хоостыра иділчеткен тайығларны чох итчеткенін, оларның орнына Христостың тайиин турғысчатханын таныхтапча. ¹⁰ Иисус Христос Худай Аннаң киректеен нимені иткен. Аннаңар Иисус Христостың иди-ханы пір хатап тайыға салылғанынаң піс прайзыбыс чазыхтаң арығланчабыс.

¹¹ Полған на абыс, күннің-танда храмда^c тоғынып ала, көп хати олох ла тайығларны идедір. Че ол тайығлар кізілерні чазыхтаң арығлап полбинчалар. ¹² Христос, тізең, чазыхтар үчүн пір ле тайығ иткен. Аның салған тайии саңайға даа читче. Анзын ит салғанда, Ол Худайның оң саринда одыр салған*. ¹³ Анда одыра, Иисус Позының ыырчыларын Худай Аның азаа алтына сал пирерін сағыпча. ¹⁴ Пір ле тайығ идіп, Христос чазыхтаң арығланчатханнарны саңайға сулу толдыра кізілер ит салған. ¹⁵ Худай Худы анзын киречілепче. Ол піди тіпче: ¹⁶ «Хан Худай теен: Килер күннерде оларға пирчең Молчаам мындағ полар: „Минің чахығларымны оларның чүректерінде пас саларбын, оларның сағыстарына сиир саларбын. ¹⁷ Оларның чазыхтарын паза чабал киректерін, тізең, паза сағыста тутпаспын“». ¹⁸ Чазыхтар позыдылчатсалар, тайығ идері паза киректелбинче.

Худайға чағын польңар

¹⁹ Харындастар! Иисус Христостың төгілген ханы піске иң ызых орынзар тідімніг кіерге чаратча. Ол піске наа чол, чуртас пирчеткен чол ас пирген. ²⁰ Пу чол көзеңе кистінзер, иң ызых орынзар апарча. Ол чолны Иисус Христос Позының иди-ханын тайыға салғанынаң асхан. ²¹ Амды Худайның прай ибінең устапчатхан пістің илбек Абызыбыс пар. ²² Худайға азых чүректіг, пик киргіністіг килеңер. Чүреебісті кірліг сағыстардаң арығлап, идібісті арығ суғнаң чууп алып, Ағаа чағдаанар. ²³ Пістің чоохтапчатхан ізенізібіске пик тудынаанар. Сөс пирген Худайға піске киргінерге чарир нооза. ²⁴ Удур-төдір полызызаанар, хынарға паза чохсы киректер идерге көөктірізеңер. ²⁵ Хай піреелері итчеткен чіли, чыылығларыбысты тастабаанар. Хан-пигібістің килер күні чағдапчатханын пілчеткенібісте, көңнілерібісті уламох көдірізеңер.

* 10:12 Пу стихты ідөк піди онаарарға чарир: «Христос, тізең, чазыхтар үчүн пір ле тайығ иткен. Анзын ит салғанда, Ол Худайның оң саринда саңайға одыр салған».

²⁶ Сынны піле-тура, чазыхта чуртирға хынчатсабыс, пісті чазыхтаң арыҗлап алчаң тайығ чоғыл. ²⁷ Андада піске Чарғы күнін паза Худайға тоғырланчатханнарны чох итчеткен чалынны, хорығып ала, сахтиры ла халча. ²⁸ Моисей Чахиин сайбаан кизиденер ікі-ўс киречі чоохтаза, ол кизіні айағ чох өдірібісченнер. ²⁹ Андағ полза, Худайның Оолғын нимее салбинчатхан кизіленер немелер полар? Олар молчағны таңмалапчатхан паза чазыхтардан арыҗлаан ханның төгілгенін аарлабинчалар. Олар паарсах Худай Худын сөклекпелер. ³⁰ Піс піди теен Худайны пілчебіс: «Мин өс аларбын. Мин оларға нандыр пирербин, тіпче Хан Худай». Ол паза піди теен: «Хан Худай поэының чонын чарғылир». ³¹ Тіріг Худайның холына кір парары хорғыстығ. ³² Алындағы тусты сағысха кирінер. Худай чарии сірерге урыл парғанда, сірер, ирее көп тее көрген ползар, уттырбаазар. ³³ Сірерге кизілернің көзіне күлгеннер, хыйыхтааннар, пірееде ідөк хыйыхтатчатхан кизілерге чөлег поларға киліскен. ³⁴ Сірер мағаа, пиктегде полғанымда, полысхазар паза ис-пайыңар пыластырғаннарында, өрінгезер: сірернің тигірде аннаң артых, хачан даа тоозылбас пайыңар парын пілгезер нооза. ³⁵ Сірернің тидімніг тудынызыңар илбек сыйыхха турызар. Андағох ла полыңар. ³⁶ Худайның көңнін толдырар паза Ол сірерге молчаан нимені алар үчүн, тыстаныс кирек. ³⁷ Худай Пічиинде чоохталча нооза: «Түрче поларынаң килчен Худай килібізер. Ол орайлатпас. ³⁸ Арығ чүректіг кизи киртіністің сылтаанда чуртир. Че ол Миннең хыйа полыбысса, Мин ағаа чөпсінмеспін». ³⁹ Піс хыйа айланыбысчатханнар паза өлім алчатханнар санынаң нимеспіс. Піс, худыбысты арачылап алар үчүн, пик киртінчебіс.

Киртініс ние полчатханнаңар

11 Киртініс — ол ізенген нименің хайди даа толарын ікінчлелен бинчеткені паза көрінмес нимелернің сынында поларын чахсы пілчеткені полча. ² Пістің өбекелерібіс киртіністері үчүн Худайның көңніне кіргеннер. ³ Тиксі-тилекей Худайның сөзі хоостыра пүт парған. Анзын піс киртінізібіс пастыра ізестіг пілчебіс. Піс көрчеткен ние харахха көрінмес нимеден пүт парған. ⁴ Авель Худайға киртінген. Аннаңар аның тайии Каинниң артых полған. Авельнің киртінізін көріп, Худай аның арығ чүректіг полчатханын киречілеен. Аннаңар Худай аның тайиин алған. Авель ол тее парған полза, аның киртінізі пүүнги күнге теере піске көзидім полча.

⁵Енох Худайға киртінген. Ол, өлім көрбин, пу чирдең чіт чөрібіскен. Пірдеезі аны таап полбаан. Аны Худай Позынзар ал парыбысхан. Че Худай Пічиинің киречілезі хоостыра, Худай аны Позынзар алғалахтох, Енох Худайның көнніне кірген полған. ⁶Киртінізі чох кізілернің пірдеезі Худайның көнніне кірбес. Худайзар килчеткен кізілер Аның парына паза Худайны тілепчеткеннер Ағаа сыйыхтадарларына ізенерге киректер.

⁷Ной Худайға киртінген. Худай хайдағ ниме поларын сизіндіргенде, Ной анзын пос хараанаң көргелек тее полза, Худайның чооғын истіп, керіп пүдір салған. Ол керіпте позын паза сөбірезін ал халған. Пу оңдайнаң Ной тилекейні чарғылаан. Ол, киртінгенненер, ахтатхан.

⁸Авраам Худайға киртінген. Аннаңар Худай ағаа, поэынын чирін тастап, молчаан чирзер парарға теенде, Худайның чооғын искен. Ол, хайдар даа парчатханын пілбин, чөрібіскен. ⁹Худай молчаан чирге киліп, ол анда пасха хан-чирінің кізізі чіли чуртаан. Че андағ даа полза, ол киртінген. Ол анда отахта чуртаан. Исаакнаң Иаков^c таа ідөк чуртааннар. Оларға прайзына Худай молчаа пирілген полған нооза. ¹⁰Авраам Худайның сағызы хоостыра паза Аның күзінең пүткен пик төстегліг саар поларын сағаан.

¹¹Сарра Худайға киртінген. Аннаңар ол, төл көрбес тее полған полза, поэында пол парып, частығда пала таап алған. Ол Худай молчаана киртінерге чарир тіп пілген. ¹²Аннаңар пала көрбес частығ Авраамнаң көп төл тараан. Аның төлі, тигірдегі чылтыстар, талай хазындағы хум осхас, көп саннығ полған. ¹³Піс чоохтапчатхан пу кізілер, Худайға киртініп ала, ол парғаннар. Олар Худай молчаан нимені сахтап полбааннар. Молчаан нимелерні ырахтын на көріп, өрінгеннер. Олар постарын пу чирге килген пасха чонмыс тіп санааннар. ¹⁴Иди сананчатхан кізілер чир-суғларын тілепчеткеннерін киречілепчелер. ¹⁵Тастап парыбызарға киліскен чирлеріненер ле сағынған ползалар, олар андар айланарчыхтар. ¹⁶Че олар артых, тигірдегі, чирні тілееннер. Аннаңар Худайға, олар Аны постарының Худайы тіп адапчатсалар, уядыстығ нимес. Худай оларға саар тимнеп пирген нооза.

¹⁷Авраам Худайға киртінген. Худай, аны сыныхтап, Исаак оолғын тайыға салдыртханда, Авраам Аның чооғын толдырарға тимде полған. Худай Авраамға көп төл молчаан, Авраам, тізең, чалғыс оолғын даа тайыға саларға тимде полған. ¹⁸Худай,

тізең, ағаа піди теен полған: «Мин молчаан төлің Исаактаң тарир». ¹⁹ Авраам, Худайға киректелзе, Исаакты өліглердең тірілдір полар тіп сағынған. Аннаңар, пасхали чоохтаза, Исаак ағаа өліглердең нандыра пиріл парған.

²⁰ Исаак Худайға киртінген. Аннаңар ол, Иаковнаң Исавты алғап, килер тустарда көп ниме поларын молчаан.

²¹ Иаков Худайға киртінген. Аннаңар үрир алнында ол Иосифтің оолларының полғанын на алғабысхан. Ол, тайағына тіреніп, Худайға пазырған.

²² Иосиф Худайға киртінген. Аннаңар үрир алнында, Израиль чоны Египеттең парыбызарын чоохтап, поэнының сөөгін хада апарыбызарға сурынған.

²³ Моисейнің іче-пабазы Худайға киртінгеннер. Аннаңар аны төрееннең үс айға читіре чазырғаннар. Олар, аның пасхачыл пала полғанын көріп, ханның час палаларны өдіреге пирген чахиинаң хорыхпааннар. ²⁴ Моисей Худайға киртінген. Аннаңар ол, өс парғанда, поэын фараон хызының палазы аданарға хынминыбысхан. ²⁵ Ол иртісчөткен чазыхтың тадиин алғанча, Худай чонынаң хада иреені көрерін таллап алған. ²⁶ Ол Христости осхас ирееленістерні Египеттің прай пайынаң артых тіп санаан. Ол Худайның пирер сыйиин көрген нооза. ²⁷ Моисей, ханның хазырланарынаң хорыхпин, киртінгені хоостыра Египеттең сығыбысхан. Көрінмес Худайны көрген чили, нандыра айланмасха пик пөгін салған. ²⁸ Киртінізі хоостыра Пасха тіп адалчатхан кибір идіп, ізіктерні ханнаң таңмалап салған. Өлім ағылчатхан Ангел, ханны көр салып, Израильнің тун оол палаларын өдірбеен. ²⁹ Киртінізі хоостыра чонынаң хада, Хызыл талайның түбі азыл парғанда, хуруғ чирче кис парыбысхан. Сүріс килген Египет чаачылары, ідөк кизерге идіп, талайда пат парғаннар.

³⁰ Израиль чоны Худайға киртінген. Аннаңар Иерихон саарның ханаларын читі хати ибірібізіп, оларның иңзеріл парғанын көр салған. ³¹ Чөреечі Раав Худайға киртін парған. Аннаңар ол китеге чөрчөткен Израиль кізілерін амырнаң удурлаан паза аның соонаң киртінерге хынмаан кізілернең хада өдірт салбаан.

³² Хоза пірее ниме чоохтирға кирек пе? Гедеоннаңар, Варактаңар, Самсоннаңар, Иеффайданар, Давидтенер, Самуилденер паза ухаанчыларданар чоохтирға тус чоғыл. ³³ Олар Худайға киртінгеннер. Аннаңар хан-чирлерні чиңеннер, Худайның көңніне кірчөткен нимелер иткеннер паза Худай оларға молчаан нимені

алғаннар. Олар ала парыстарның аастарын чаба тутханнар, ³⁴ хазыр кӱйчеткен оттарны ӱзӱрӱбӱсченнер, хылыстаң ӱлерӱнең ара-чыланып алчаңнар. Оларның кӱс чоғы кӱске айлан парчаң. Олар кӱстӱг полып, чаалазыҕларда пасха хан-чирлерӱнӱң сирӱглерӱн утып алчаңнар. ³⁵ Ипчӱлер Худайҕа киртӱн парып, ӱл парған туған-чағыннарын тӱрӱг айландырып алчаңнар. Пасхалары, постарын харибдең позыдарынаң тоғыр саап, ирееледӱп, тоозылғаннар. Олар, артых чуртасха тӱрӱлдірерлерӱне ӱзенӱп, ӱди иткеннер. ³⁶ Паза пасхаларын, иреелеп, соғып, палҕап, харибге одыртчаңнар. ³⁷ Оларны тастарнаң чоо чаалачаңнар, игееснең чара игеченнер, иреелеченнер, хылыснаң ӱдӱрченнер. Олар истебеен хой, ӱскӱ теерӱзӱн кис чӱрченнер, хызылчаңнар, оларны сӱрченнер, хыйыхтачаңнар. ³⁸ Пу тилекей андаҕ кӱзӱлерге турыстыҕ нимес. Олар хуу чазыларзар, таҕларзар тизӱп, кӱндей хайаларда, оймахтарда чазынып чуртап чӱргеннер. ³⁹ Олар киртӱнистерӱн ӱзестӱг киречӱлееннер. Че Худай молчаан нименӱ оларҕа пирбеен. ⁴⁰ Худай пӱске хайдаҕ-да артых нӱме пӱгӱн салған. Худай оларны, пӱс чох иң артыҕына чидӱп албазыннар тӱп, ӱди иткен.

Худай хынчатхан кӱзӱнӱ хатыҕлапча

12 Прай пу киречӱ полчатхан, толдыра киртӱнистӱг кӱзӱлер пӱс-тӱң ибӱре кӱп. Аннаңар, харыҕ полчатхан нименӱ хыйа тастап, пӱстӱ тутчатхан чазыхтаң позааңар, чарысчатхан чолыбысты ӱзестӱг иртӱбӱзеенер. ² Иисусха кӱреенер. Ол пӱстӱг киртӱнӱзӱбӱстӱ пастабызып, аны толдыра итче. Аны сағыпчатхан ӱрӱнистӱ Иисус пӱлген. Че пастап, Ол уйаттаң хорыхпин, киресте ирее кӱрген. Амды, тӱзең, Ол Худайның оң саринда одырча. ³ Аҕаа нименӱ иртерге килӱскенӱн сағысха алыңар. Чазыхтыҕ чонҕа хыйыхтадып, хайди ирееленген. Анзы сӱрерге, кӱнӱнернӱ тӱзӱрбин, махачы тудыңарҕа полыссын.

⁴ Сӱрерге хан тӱгӱлгенче чазыхнаң кӱрезерге килӱскелек. ⁵ Алай Худай сӱрернӱ, Позының оолларын чӱли, часхарҕанын ундут салҕазар ба? «Оолҕым, Хан Худайның тӱзеткенӱне хайбин полба, Ол синӱ хатыҕлапчатса, кӱнӱнӱнӱ тӱзӱрбе. ⁶ Худай хынчатхан кӱзӱнӱ тӱзетче паза „оолҕым“ теен кӱзӱнӱ сохча». ⁷ Хан Худайның тӱзеткенӱне сыдапчатсанар, пӱлӱнер, ол сӱрернӱ, Позының оолларын чӱли, ӱди тӱзетче. Пабазы тӱзетпеен пала пар ба? ⁸ Ноо даа паба-ӱче палаларын тӱзедедӱр. Аннаңар, Худай сӱрернӱ тӱзетпинчетсе, сӱрер Аның ооллары нимессер, сукас палаларзар.

⁹ Паба-ічебіс пісті түзеткеннерінде, піс оларны улуғлаабыс. Улам тигірдегі Пабабыстың чооғын истерге паза ол ондайнаң чуртас аларға кирекпіс. ¹⁰ Пістің паба-ічебіс пос хынғанни ұр нимеске ле түзет салчаннар. Худай, тізең, піске туза идіп, Позы осхас ах-арығ поларыбыс үчүн, пісті түзетче. ¹¹ Пісті түзетчетселер, піс өрінминчебіс, че хомзынчабыс. Соонаң, тізең, түзетірген кізі, арығ чүректіг пол парза, ол сыйыхха амыр хоныхты алар. ¹² Аннаңар түс парған холларыңны көдірібізіңер, пос пол парған чүллеріңни хатырыбызыңар. ¹³ Көні чолларча чөріңер: ахсапчатхан кізі частыхпазын, че айдас пол парзын.

Худайның көңіне кірер үчүн хайди чуртирға

¹⁴ Прайзынаң хада ынағ чуртирға, ах-арығ поларға күстеніңер. Иди полбаза, Хан Худайны пірдеезі көрбес. ¹⁵ Көріңер, Худайның паарсазынаң сірернің пірдеезі хал парбазын. Сірернің арнаңарда ачығ тамырлар өс парбазын. Олар өсчоткен чирлерде көп кізі ооларына оох парча. ¹⁶ Араңарда чөреечі алай Худайны улуғлабинчатхан кізі пол парбазын. Исав осхас кізілер пір азырал үчүн улуғ оолның үлүзін орнастырыбызарға тимделер. ¹⁷ Сірер пілчезер, соонаң ол пабазының алғазын аларға сағынған. Че иділ парған нимені түзет полбаан. Харах чазын төгіп ала пабазына алданған даа полза, хыйа тасталған.

Пурунғы паза Наа Молчағ.

¹⁸ Сірер чалыннап көйчеткен Синай^c тағзар, чыплама харасхызар, пүрүңкізер, хазыр чилге чағдабаазар. ¹⁹ Пырғы табызына, хазыр үнге дее килбеезер. Израиль чоны, ол үнни ис салғанда, аны паза испеске тіп алданған. ²⁰ Олар «Мал даа пу таға чағдаза, тастарнаң чааладарға кирек» тіп чоохталчатхан чахыңдан хорыхханнар. ²¹ Прай пу нименің хорғыстығ көріміне сыдаспин, Моисей теен: «Хорығып, халтырапчам». ²² Сірер, тізең, Сион тағзар, Тіріг Худайның саарынзар чит килгезер. Сірер көп ангеллер полчатхан тигірдегі Иерусалимзер килгезер. ²³ Худайның тун палаларының тигірибінзер^c килгезер. Оларның аттары тигірде пазыл парғаннар. Сірер прай кізілернің Чарғычызы полчатхан Худайзар паза толдыра чохсы, арығ чүректіг кізілерінзер килгезер. ²⁴ Сірер Наа Молчағны пирген Иисуссар паза ханының чачырадызына килгезер. Аның ханы Худайдаң пыро тастирдаңар сурынча. Ол хан Авельнің өс алардаңар сурынчатхан ханынаң

тың хысхырча. ²⁵ Көрінер зе, сірерзер айланчатхан Худайдаң төдір полбанар. Худайның пу чирдегі чахығларын чоохтапчатхан Моисейні истерге хынмаан кізілер хатығлас чох халбааннар. Піс тее, тигірдең чоохтапчатхан Худайны испезебіс, улам хызаанна-дарбыс. ²⁶ Ол туста Аның үні чирні сілігібіскен. Ам, тізең, Ол сөс пирген: «Чирні ле нимес, тигірні дее ам даа хатап сілігібі-зербін». ²⁷ «Ам даа хатап» теені прай чайаан нименің сілігіліп, чох иділеріненер ізестіг киречілепче. Андада сілік полбас ла ниме чат халар. ²⁸⁻²⁹ Піс изелбес хан-чирін алчабыс. Аннаңар алғыстап пілеенер. Алғыстап ала, Худайның көңніне килістіре Аның нымызына чөреенер. Пістің Худайыбыс прай нимені чох итчеткен чалын осхас. Аннаңар Аны улуғлаанар паза Аннаң хорығаанар.

Түгенчі үгредіг чоох

13 Удур-төдір, харындастар чіли, хынызыңар. ² Иб-чуртыңарға чол чөрчеткен кізілерні кирчедінер. Піреелері, иди идіп, постары даа пілінмин халып, ангеллерні аалчы иттірлер. ³ Харибдегі кізілерденер сағыныңар. Постарың пиктегде полған чіли, оларға сағыссыранар. Ирееленчеткен кізілерденер сағыныңар. Оларға, постарың идөк ирееленген чіли, айанар. ⁴ Ирпчі палғалызын аарланар. Ирлері дее, ипчілері дее киртістіг поларға киректер. Оралысха паза чөрееске сабылғаннарны Худай поэ чарғылапча. ⁵ Ахчаа сабылбаңар, пар нимее чөпсінінер. Худай Поэ теен, хайза: «Сині халғыспасын, сині тастабасын». ⁶ Аннаңар піске тідімніг чоохтанарға чарир: «Худай мағаа полысча. Мағаа пір дее нимеден хорығарға кирек чоғыл. Ыырчы мағаа хайдағ чабал ниме ит полар?» ⁷ Устағчыларыңнаңар сағыныңар. Олар сірерні Худайның сөзіне үгреткеннер. Олар хайди чуртаанын паза үреенін сағынып, олар киртінген чіли киртінінер. ⁸ Иисус алыспинча: кичее хайдағ полған, пүүн дее, хақан даа андағох. ⁹ Оң-пасха паза пасхачыл үгредіглерге сірерні сын чолдаң апарыбызарға пирбенер. Ниме чирге алай чібеске тіп чоохтапчатхан үгредіглер нимес, Худай паарсазы чүректерінні пик итсін. Андағ үгредіглернең айғасчатхан кізілер олардаң пір дее туза албинчалар. ¹⁰ Иерусалимдегі храмның абыстарына пістің тайиыбыстаң алған малның идін чирге чарабас. ¹¹ Кізілернің чазыхтарының үчүн иң улуғ абыс тайыға салылған малның ханын иң ызых орынзар апарчаң. Малның иди, тізең, аал тастында өртелчен. ¹² Аннаңар Иисус таа саар тастында өлген. Иди Ол

Позының ханынаң кізілерні ахтаан. ¹³Саар тастынзар сығаанар паза Ағаа көрерге киліскен уйатты хада үлезеенер. ¹⁴Мында, чир үстүнде, піске сыбыра чуртачаң саар чоғыл. Піс пүдірілер саарны тілепчебіс. ¹⁵Иисустың пастыра Худайны сыбыра сабландыраанар. Піс Худайның адын саблирбыс. Анзы аастаң сыххан пістің тайиыбыс полар. ¹⁶Кізілерге чахсы идерге ундубанар. Удур-төдір полызызыңар. Иди иткені Худайның көңніне кірчеткен тайығ полча нооза. ¹⁷Устағчының чооғын истиңер, ол теен нимені идіңер. Оларға сірернің үчүн Худайның алнында нандырығ тударға кирек. Аннанар олар сірернің арачыланызыңарданар сыбыра сағынчалар. Оларның чооғын иссеңер, олар тоғыстарын өрініп ала итchedерлер. Чоох испезенер, тоғыстарын мөніссіреп ала идерлер. Анзы сірернің тузанаңа полбас.

Сурыныстар паза алғастар

¹⁸Пістің үчүн пазырыңар. Піс хачан даа орта идерге күстенчебіс. Аннанар пістің сағыстарыбыс пісті чарғылабинчалар. ¹⁹Худай мині сірерзер табырах нандыра ыссын тіп, улам тың пазырыңар. ²⁰⁻²¹Иисус Худайның мөгі Молчаан Позының ханынаң таңмалабысхан. Ол ондайнаң Ол Позының хойларының Илбек хадарчызы полыбысхан. Амыр пирчеткен паза Иисусты тірілдірібіскен Худай сірерні ноо даа чахсы кирекке пик итсін. Чахсы киректер идіп, сірер Аның көңнін толдырчазар. Ол, тізең, Иисус Христостың пастыра сірерде тоғыс апарып, Позының көңніне кірер иде сірерні алыстырча. Иисусха хачан даа сабланыс ползын! Аминь^с.

Түгенці сөстөр

²²Харындастар, мин сірерге пасхан сөстөрні чүректеріне алыңар тіп сурынчам. Пу пічиим тың узун нимес нооза. ²³Піліңер, Тимофей харындазыбыс харибдең сыхты. Ол пу чағында минзер килзе, мин, сірернең тоғазарға парчатсам, аны хада алып аларбын. ²⁴Сірернің устағчыларыңа паза прай ах-арығ кізілерге изен читіріңер. Италий чиріндегі харындастар сірерге изен читірчелер. ²⁵Сірерге прайзыңарға Худай паарсазы ползын. Аминь.